

34 kandidatow wobkrućenych

Njebjelčicy (SN/at). Wo mandat w přěnim Serbskim sejmje požada so 34 žonow a muži z Delnjeje, sředźneje a Hornjeje Łužicy. Na zakładže zapodatych podložkow wobkrući wólbny wuběrka na swojim posedženju zawčerawšim, pónđzelu, w Njebjelčicach jednotliwe kandidatury. Slěd kandidatow na hłosowaniskim lisćiku je předsyda wólbneho wuběrka dr. Hagen Domaška wulosował. Na přěnim městnje hornjołužiskeje lisćiny steji Aneta Zahrodnikowa z Ćiska, namjetowana wot Serbskeje bjesady Ćisk a podpěrarjow, delnjołužisku nawjeduje Siebert Budyšin z Myšina, nastajeny wot towarstwa Pónaschemu.

Kandidatna lisćina za Hornju Łužicu wopřijima 19 mjenow, mjez nimi šěsć žonow. Na 15 wosobow wopřijacej lisćinje za Delnju Łužicu steja tež kandidaća z Mužakowskich a Slepjanskich stron. Tež tu nastupi šěsć žonow. Wobsadzić ma so z kóždeje lisćiny stajnje dwanaće mandatow, zo byštej Delnja a Hornja Łužica personelnje jenak sylnje zastupjenej byłoj.

Mnozy Serbja a wšelake serbske towarstwa pak na tele přenje wólby přewšo dwělomnje hladaja.